

四庫全書

集部

欽定四庫全書

集部

草堂詩餘卷四

詳校官編修_臣周瓊

侍讀_臣孫球覆勘

總校官庶吉士_臣倉聖脉

校對官中書_臣孫球

謄錄監生_臣郭履元

欽定四庫全書

草堂詩餘卷四

長調

水龍吟

春遊

陸務觀

摩訶池上追遊路紅綠參差春晚韶光妍媚海棠如醉
桃花欲暖桃菜初閒禁烟將近一城絲管看金鞍爭道
香車飛蓋爭先占新亭館惆悵年華暗換黯銷魂雨

收雲散鏡奩掩月釵梁折鳳箏絃零鴈身在天涯亂山
孤壘危樓飛觀歎春來只有楊花和恨向東風滿

春恨

陳同甫

鬧花深處層樓畫簾半捲東風軟春歸翠陌平莎茸嫩
垂楊金淺遲日催花淡雲閣雨輕寒輕暖恨芳菲世界
游人未賞都付與鶯和燕 寂寞憑高念遠向南樓一
聲歸雁金釵鬪草青絲勒馬風流雲散羅綬分香翠綃
封淚幾多幽怨正銷魂又是疎烟淡月子規聲斷

清明

劉叔安

弄晴臺館收煙候時有燕泥香墜宿醒未解單衣初試
騰騰春思前度桃花去年人面重門深閉記彩鸞別後
青驄歸去長亭路芳塵起十二屏山遍倚任蒼苔點
紅如綴黃昏人靜暖香吹月一簾花碎芳意婆婆綠陰
風雨畫橋烟水笑多情司馬留春無計濕青衫淚

贈妓

秦少游

小樓連苑橫空下窺繡轂雕鞍驟疎簾半捲單衣初試

清明時候破煖輕風弄晴微雨欲無還有賣花聲過盡
垂楊院落紅成陣飛鴛鴦 玉佩丁東別後悵佳期參
差難又名韁利鎖天還知道和天也瘦花下重門柳邊
深巷不堪回首念多情但有當時皓月照人依舊

高齋詩話秦少游在蔡州與管妓婁婉字東玉
者甚密贈之詞云小樓連苑橫空又曰玉佩丁
東別後是也又贈妓陶心兒詞南歌子云玉漏
迢迢盡銀河淡淡橫夢回宿酒未全醒已被鄰
雞催起怕天明燈臂上粧猶在襟間淚尚盈水
邊燈火漸人行天外一鉤殘月帶三星末句隱

心字
也

慶壽

辛幼安

渡江天馬南來幾人真是經綸手
長安父老新亭風景可憐依舊
夷甫諸人神州沉陸幾曾回首
算平戎萬里功名本是真儒事
君知否況有文章山斗對桐陰滿
庭清晝當年墮地而今試看風雲
奔走綠野風烟平泉草木東山歌
酒待他年整頓乾坤事了為先生
壽

詠笛

蘇東坡

楚山修竹如雲異材秀出千林表
龍鬚半翦鳳膺微漲

玉肌勻繞木落淮南雨晴雲夢月明風裊自中郎不見
桓伊去後知辜負秋多少 聞道嶺南太守後堂深綠
珠嬌小綺窓學弄梁州初遍霓裳未了嚼徵含宮泛商
流羽一聲雲杪為使君洗盡蠻風瘴雨作霜天曉

梨花

周美成

素肌應怯餘寒艷陽占盡青蕪地樊川照日靈關遮路
殘紅斂避傳火樓臺妬花風雨長門深閉亞簾櫳半濕
一枝在手偏勾引得黃昏淚 別有風前月底布繁英

滿園歌吹朱鉛退盡潘妃却酒昭君乍起雪浪翻空粉
裳縞夜不成春意恨玉容不見瓊英謾好與何人比

楊花

章質夫

燕忙鶯懶芳殘正堤上柳花飄墜輕飛亂舞點畫青林
全無才思閒趁遊絲靜臨深院日長門閉傍珠簾散漫
垂垂欲下依前被風扶起蘭帳玉人睡覺怪春衣雪
霑瓊綴繡床漸滿香毬無數纔圓却碎時見蜂兒仰粘
輕粉魚吞池水望章臺路杳金鞍遊蕩有盈盈淚

玉林詞話云質夫傍珠簾
散漫數語形容盡之矣

楊花

蘇東坡

似花還似非花也無人惜從教墜拋街傍路思量却似
無情有思縈損柔腸困酣嬌眼欲開還閉夢隨風萬里
尋郎去處又還被鶯呼起不恨此花飛盡恨西園落
紅難綴曉來雨過遺蹤何在一池萍碎春色三分二分
塵土一分流水細看來不是楊花點點是離人淚

曲有舊聞云章質夫水龍吟詠楊花其命意用事
清灑可喜東坡和之若豪放不入律呂徐而視之聲

韻諧婉便覺質夫詞有織繡工夫故鼂叔用云東坡如
毛牆西施淨洗却面與天下婦人鬪好質夫豈可比耶

瑞鶴仙

上元

康伯可

瑞烟浮禁苑正絳闕春回新正方半冰輪桂華滿溢花
衢歌市芙蓉開遍龍樓兩觀見銀燭星球有爛捲珠簾
盡日笙歌盛集寶釵金釧堪羨綺羅叢裏蘭麝香中
正宜遊翫風柔夜煖花影亂笑聲喧鬧蛾兒滿路成團
打塊簇著冠兒鬪轉喜皇都舊日風光太平再見

玉林詞話云伯可渡江初有聲樂府受知秦申王王薦於高宗皇帝以六詞待詔金馬門凡中興粉飾治具及慈寧歸養兩宮歡集必假伯可之歌詠故應制之詞為多按此詞進入太上皇帝極稱賞風柔夜煖以下數句至於末章賜金甚厚

春情

歐陽永叔

臉霞紅印枕睡覺來冠兒還是不整屏間麝煤冷但眉山壓翠淚珠彈粉堂深晝永燕交飛風簾露井恨無人與說相思近日帶圍寬盡重省殘燈朱幌淡月紗窓那時風景陽臺路遠雲雨夢便無準待歸來先指花梢

教看却把心期細問問因循過了青春怎生意穩

春遊

周美成

悄郊原帶郭行路永客去車塵漠漠斜陽映山落斂餘
紅猶戀孤城欄角凌波步弱過短亭何用素約有流鶯
勸我重解繡鞍緩引春酌不記歸時早暮上馬誰扶
醒眠朱閣驚飈動幕扶殘醉遶紅藥嘆西園已是花深
無地東風何事又惡任流光過却猶喜洞天自樂

醉翁亭

黃山谷

環滁皆山也望蔚然深秀琅邪山也山行六七里有翼然泉上醉翁亭也翁之意也得之心寓之酒也更野芳佳木風高石出景無窮也游也山肴野蔌酒冽泉香沸觥籌也太守醉也諠譁衆賓歡也况宴酣之樂非絲非竹太守樂其樂也問當時太守謂誰醉翁是也

慶春宮

秋怨

周美成

雲接平岡山圍寒野路回漸轉孤城衰柳啼鴉驚風驅

鴈動人一片秋聲倦途休駕淡烟裏微茫見星塵埃憔悴生怕黃昏離思牽縈華堂舊日逢迎花艷參差香霧飄零絃管當頭偏憐嬌鳳夜深簧暖笙清眼波傳意恨密約匆匆未成許多煩惱只為當時一餉留情

拜星月慢

秋怨

周美成

夜色催更清塵收露小曲幽坊月暗竹檻燈窓識秋娘庭院笑相遇似覺瓊枝玉樹暖日明霞光爛水晒蘭情

總平生稀見 畫圖中舊識春風面誰知道自到瑤臺
畔眷戀雨潤雲溫苦驚風吹散念荒寒寄宿無人館重
門閉敗壁秋蟲歎怎奈向一縷相思隔溪山不斷

石州慢

感舊

張仲宗

寒水依痕春意漸回沙際煙闊溪梅晴照生香冷藥數
枝爭發天涯舊恨試看幾許消魂長亭門外山重疊不
盡眼中青怕黃昏時節 情切畫樓深閉想見東風暗

消肌雪辜負枕前雲雨樽前花月心期切處更有多少
淒涼殷勤留與歸時說到得再相逢恰經年離別

畫錦堂

閨情

周美成

雨洗桃花風飄柳絮日日飛滿雕簷懊恨一春幽恨盡
屬眉尖愁間雙飛新燕語更堪孤枕宿醒忼雲鬟亂獨
步畫堂輕風暗觸珠簾多厭晴晝永瓊戶悄香銷金
獸慵添自與蕭郎別後事事俱嫌短歌新曲無心理鳳

簫龍管不曾拈空惆悵長是每年三月病酒慊慊

南浦

旅況

魯逸仲

風悲畫角聽單于三弄落譙門投宿駸駸征騎飛雪滿
孤村酒市漸闌燈火正敲牕亂葉舞紛紛送數聲鷺鴈
下離烟水嘹唳度寒雲好在半隴溪月到如今無處
不銷魂故國梅花歸夢愁損綠羅裙為問暗香閒艷也
相思萬點付啼痕算翠屏應是兩眉餘恨倚黃昏

氏州第一

秋思

周美成

波落寒汀村渡向晚遙看數點帆小亂葉翻鴉驚風破
鴈天角孤雲縹緲官柳蕭疎甚上掛微微殘照景物關
情川途換目頓來催老漸解狂朋歡意少奈猶被思
牽情繞座上琴心機中錦字覺最縈懷抱也知人懸望
久薔薇謝歸來一笑欲夢高唐未成眠霜空已曉

宴清都

春閨

何籀

細草沿堦軟紅日薄蕙風輕
靄暖東君靳惜桃英尚
小柳芽猶短羅幃繡幙高捲
早已是歌慵笑嬾凭畫樓
那更天遠山遠水遠人遠
堪怨傳粉跡狂竊香俊
雅無計拘管青絲絆馬紅
纓繫羽甚處迷戀無言淚珠
零亂翠袖儘重重漬遍故要
得別後思量歸時覩見

秋思

周美成

地僻無鐘鼓殘燈滅夜長人倦
難度寒吹斷梗風翻暗

雨洒窓填戶賓鴻謾說傳書算過盡千儔萬侶始信得
庾信愁多江淹恨極須賦 淒涼病損文園徽絃乍拂
音韻先苦淮水夜月金城暮草夢鳬飛去秋霜半入青
鏡嘆帶眼都移舊處更久長不見文君歸時認否

齊天樂

端午

周美成

疎疎幾點黃梅雨佳時又逢重午角黍包金香蒲切玉
風物依然荆楚形裁艾虎更釵裊朱符臂纏紅縷撲粉

香綿喚風綾扇小窗午
沉湘人去已遠勸君休對景
感時懷古謾嘯鶯喉輕敲象板勝讀離騷章句荷香暗
度漸引入醺醺醉鄉深處卧聽江頭畫船喧韻鼓

花犯

梅花

周美成

粉牆低梅花照眼依然舊風味露痕輕綴疑淨洗鉛華
無限清麗去年勝賞曾孤倚冰盤共燕喜更可惜雪中
高士香篝薰素被今年對花最匆匆相逢似有恨依

依憔悴凝望久青苔上旋看飛墜相將見脆圓薦酒人
正在空江烟浪裏但夢想一枝瀟洒黃昏斜照水

玉林詞選云此只詠梅花而紆餘反覆道盡三年間事昔人謂好詩圓美流轉如彈丸余於此

詞亦云愚謂此為梅花第一

喜遷鶯

立春

胡浩然

譙門殘月聽畫角曉寒梅花吹徹瑞日烘雲風和解凍
青帝乍臨東闕暖向土牛簫鼓天路珠簾高揭最好是

戴綵幡春勝釵頭雙結 奇絕開宴處珠履玳簪俎豆
爭羅列舞袖翩翻歌喉縹緲壓倒柳腰鶯舌勸我應時
納祐還把金爐香熟願歲歲這一卮春酒長陪佳節

雙溪老人云浩然此詞先紀節序次
迷宴賞未歸應時納祐一一有歸宿

閨元宵

吳子和

銀蟾光彩喜稔歲閨正元宵還再樂事難并佳時罕遇
依舊試燈何礙花市又移星漢蓮炬重芳人海盡勾引
徧嬉遊寶馬香車喧隘 晴快天意教人月更圓償足

風流債媚柳煙濃
天桃紅小景物迥然堪愛
巷陌笑聲不斷襟袖餘香
仍在待歸也便相期明日
踏青挑菜

端午

吳子和

梅霖初歇正絳色海榴爭
開佳節角黍包金香蒲切玉
是處玳筵羅列鬪巧盡輸年
少玉腕綵絲雙結艤彩舫
見龍舟兩兩波心齊發奇絕
難畫處激起浪花翻作
湖間雪畫鼓轟雷紅旗掣雷
奪罷錦標方徹望中水天
日暮猶自珠簾高揭棹歸晚
載荷香十里一鉤新月

慶壽

康伯可

臘殘春早正簾幙護寒樓臺清曉寶運當千佳辰餘五
嵩嶽誕生元老帝遣阜安宗社人仰雍容廊廟盡總道
是文章孔孟勲庸周召師表方眷遇魚水君臣須信
從來少玉帶金魚朱顏綠鬢占斷世間榮耀篆刻鼎彝
將遍整頓乾坤都了願歲歲見柳梢青淺梅英紅小

按此詞語意儘佳惜皆媚
竈之語蓋為檜相作耳

春雲怨

上巳

馮偉壽

春風惡劣把數枝香錦和鶯吹折雨重柳腰嬌困燕子
欲扶扶不得軟日烘烟乾風收霧杳藥荼蘼弄顏色簾
幙輕陰圖書清潤日永篆香絕 盈盈笑靨宮黃額試
紅鸞小扇丁香雙結團鳳眉心倩郎貼教洗金壘共看
西堂醉花新月曲水成空麗人何處往事暮雲萬葉

春從天上來

感舊

吳彥高

海角飄零嘆漢苑秦宮墜露飛螢夢回天上金屋銀屏
歌吹競舉青冥問當時遺譜有絕藝鼓瑟湘靈促哀彈
似林鶯嚦嚦山溜泠泠梨園太平樂府醉幾度春風
鬢髮星星舞徹中原塵飛滄海風雪萬里龍庭寫胡笳
幽怨人憔悴不似丹青酒微醒一軒涼月燈火青熒

彥高序云會寧府遇老姬善琵琶自言梨園舊籍因有感而賦此後三山鄭中鄉嘗從張貴謨使金亦聞彼中有歌之者

綺羅香

春雨

史邦卿

做冷欺花，將烟困柳，千里偷催春暮。盡日冥迷，愁裏欲
飛還住。驚粉重、蝶宿西園。喜泥潤、燕歸南浦。最妨他佳
約，風流鈿車不到杜陵路。沉沉江上望極，還被春潮
急難尋。官渡隱約遙峯，和淚謝娘眉嫵。臨斷岸、新綠生
時，是落紅帶愁流處。記當日、門掩梨花，剪燈深夜語。

玉林詞話云：臨斷岸以下數語，姜堯章稱賞謂梅溪
之詞蓋能融情景于一家，會句意于兩得，其謂是歟。

雨霖鈴

欽定四庫全書

草堂詩餘
卷四

秋別

柳耆卿

寒蟬淒切對長亭晚驟雨初歇都門帳飲無緒方留戀
處蘭舟催發執手相看淚眼竟無語凝咽念去去千里
烟波暮靄沉沉楚天闊多情自古傷離別更那堪冷
落清秋節今宵酒醒何處楊柳岸曉風殘月此去經年
應是良辰好景虛設便縱有千種風情更與何人說

永遇樂

春情

解方叔

風暖鶯嬌露濃花重天氣和煦院落烟收垂楊舞困無
奈堆金縷誰家巧縱青樓絃管惹起夢雲情緒憶當時
紋衾粲枕未嘗暫孤鴛侶 芳菲易老故人難聚到此
翻成輕誤閨苑仙遙蠻箋縱寫何計傳深訴青山綠水
古今長在惟有舊歡何處空贏得斜陽暮草淡烟細雨
送入我門來

除夕

胡浩然

茶壘安扉靈燄掛戶神儼烈竹轟雷動念流光四序式

週回須知今歲今宵盡似頓覺明年明日催向今夕是
處迎春送臘羅綺筵開 今古徧同此夜賢愚共添一
歲貴賤仍偕互祝遐齡山海固難摧石崇富貴錢鏗壽
更潘岳儀容子建才仗東風盡力一齊吹送入此門來
歸朝歡

春遊

馬莊父

聽得提壺沽美酒人道杏花深處有杏花狼籍鳥啼風
十分春色今無九麝煤銷永晝青烟飛上庭前柳畫堂

深不寒不煖正是好時候
團團寶月憑纖手暫借歌
喉抬舞袖真珠滴破小槽紅香肌縮盡纖羅瘦投分須
白首黃金散與親和舊且銜盃壯心未落風月長相守

春閨

張子野

聲轉轆轤聞露井曉引銀瓶牽素綆西園人語夜來風
叢英飄墮紅成逕寶貌煙未冷蓮臺香蠟殘痕凝等身
金誰能得意買此好光景
粉落輕粧紅玉瑩月枕橫
釵雲墜領有情無物不雙栖文禽只合常交頸晝夜歡

豈定爭如翻作春宵永日瞳矓嬌柔嬾起簾壓捲花影
花心動

春景

阮逸女

仙苑春濃小桃開枝枝已堪攀折乍雨乍晴輕暖輕寒
漸近賞花時節柳搖臺榭東風軟簾櫳靜幽禽調舌斷
魂遠閒尋翠徑頓成愁結此恨無人共說還立盡黃
昏寸心空切強整繡衾獨掩朱扉簾枕為誰鋪設夜長
宮漏傳聲遠紗窓映銀缸明滅夢回處梅梢半籠淡月

花庵詞客云阮逸女工
於文詞惟此曲傳于世

瀟湘逢故人慢

初夏

王和甫

薰風微動方榴花弄色萱草成窩翠幃敞輕羅試冰簟
初展幾尺湘波疎簷廣厦稱瀟湘一枕南柯引多少夢
魂歸緒洞庭雨棹烟簑驚回處閒晝永更時時燕雛
鶯友相過正綠影婆娑況庭有幽花池有新荷青梅煮
酒幸隨分贏取高歌功名事到頭終在歲華忍負清和

應天長

寒食

周美成

條風布暖霏霧弄晴池塘遍滿春色正是夜堂無月沉
沉暗寒食梁間燕前社客似笑我閉門愁寂亂花過隔
院芸香滿地狼籍長記那回時邂逅相逢郊外駐油
壁又見漢宮傳燭飛烟五侯宅青青草迷路陌強載酒
細尋前跡市橋遠柳下人家猶自相識

閨情

康伯可

管絃繡陌燈火畫橋塵香舊時歸路腸斷蕭娘舊日風
簾映朱戶鶯能舞花解語念後約頓成輕負緩雕轡獨
自歸來凭欄情緒楚岫在何處香夢悠悠花月更無
主惆悵後期空有鱗鴻寄紉素枕前淚牕外雨翠幙冷
夜涼虛度未應信此度相思寸腸千縷

尉遲盃

離別

周美成

隋堤路漸日晚密靄生深樹陰陰淡月籠沙還宿河橋

深處無情畫舸都不管烟波隔南浦等行人醉擁重衾
載將離恨歸去因念舊客京華長偎傍疎林小檻歡
聚冶葉倡條俱相識仍慣見珠歌翠舞如今向漁村水驛
夜如歲焚香獨自語有何人念我無慘夢覓凝想鴛侶
西河

金陵懷古

周美成

佳麗地南朝盛事誰記山圍故國遶清江髻鬟對起怒
濤寂寞打孤城風檣遙度天際斷崖樹猶倒倚莫愁艇子

曾繫空遺舊跡鬱蒼蒼霧沉半壘夜深月過女牆來傷
心東畔淮水酒旗戲鼓甚處市想依稀王謝鄰里燕
子不知何世入尋常巷陌人家相對如說興亡斜陽裏

漁隱叢話云王謝是二姓即王導謝安之族所居名烏衣巷有曰烏衣之聚不當作謝安或者乃引劉斧撫遺所載唐王謝航海遇風抵一州見烏衣國王以女妻之後謝思歸取飛雲軒令謝入其中閉目少息至其家視之梁上雙燕呢喃後寄詩曰誤到華胥國裏來主人終日獨憐才雲軒漂去無消息洒淚春風幾百回女荅曰昔日相逢冥數合今時睽遠是生離來年縱有相思字三月天南無雁飛此小說虛誕何可信也

春霽

春晴

胡浩然

遲日融和乍雨歇東郊嫩草凝碧紫燕雙飛海棠相襯
粧點上林春色黯然望極困人天氣渾無力又聽得園苑
數聲鶯囀柳陰直當此暗想故國繁華儼然遊人依
舊南陌院深沉梨花亂落那堪如練點衣白酒量頓寬
溪量窄算此情景除非殢酒狂歡恣歌沉醉有誰知得

秋霽

秋晴

陳後主

虹影侵堦乍雨歇長空萬里凝碧孤鶩高飛落霞相映遠
狀水鄉秋色黯然望極動人無限愁如織又聽得雲外
數聲新鴈正嘹唳當此暗想畫閣輕拋杳然殊無些
箇消息漏聲稀銀屏冷落那堪殘月照窓白衣帶頓寬
猶阻隔算此情苦除非宋玉風流共懷傷感有誰知得
槩括東坡前赤壁

宋謙甫

壬戌之秋是蘇子與客泛舟赤壁舉酒屬客月明風細
水光與天相接扣舷唱月桂棹蘭槳堪遊逸又有客能

吹洞簫和聲嗚咽 追想孟德困於周郎到今空有當
時蹤跡算惟有清風朗月取之無禁用不竭客喜洗盞
還再酌既已同醉相與枕藉舟中始知東方晃然既白
解連環

閨情

周美成

怨懷難託嗟情人斷絕信音遼邈縱妙手能解連環似
風散雨收霧輕雲薄燕子樓空暗塵鎖一牀絃索想移
根換葉盡是舊時手種紅藥 汀洲漸生杜若料舟移

岸曲人在天角漫記得當日音書把閒語閒言待總燒却
水驛春回望寄我江南梅萼拚今生對花對酒為伊淚
落

二郎神

春怨

徐幹臣

悶來彈鵲又攪碎一簾花影謾試著春衫還思纖手薰
徹金猊燼冷動是愁端如何向更怪得新來多病嗟舊
日沈腰而今潘鬢怎堪臨鏡重省別時淚漬羅襟猶

凝料為我厭厭日高慵起長託春醒未醒鴈足不來馬
蹄難駐門掩一庭芳景空竚立盡日欄干倚遍晝長人
靜

苔溪漁隱云馬蹄猶駐駐
字一作去字語意乃佳

古今詩話悶字深有意義鵲本
喜聲為其無憑乃悶而彈之

七夕

柳耆卿

炎光初謝過暮雨芳塵輕灑乍露冷風清庭戶爽天如水
玉鉤遙掛應是星娥嗟久阻叙舊約飈輪欲駕極目處

微雲暗度耿耿銀河高瀉
閒雅須知此景古今無價
運巧思穿針樓上女擡粉面雲鬟相亞鈿合金釵私語
處算誰在回廊影下願天上人間占得歡娛年年今夜
望遠行

冬雪

柳耆卿

長空降瑞寒風剪淅淅瑤花初下亂飄僧舍密洒歌樓
迤邐漸迷鴛瓦好是漁人披得一簑歸去江山晚來堪
畫滿長安高却旗亭酒價
幽雅乘興最宜訪戴泛小

棹越溪瀟灑皓鶴奪鮮白鵬失素千里廣鋪寒野須信
幽蘭歌斷同雲收盡別有瑤臺瓊榭放一輪明月交光
清夜

望梅

小春

柳耆卿

小寒時節正同雲暮慘勁風朝冽信早梅偏占陽和向
日處凌晨數枝先發時有香來望明艷遙知非雪展礪
金嫩藥弄粉素英旖旎清徹 仙姿更誰並列有幽光

照水疎影籠月且大家留倚欄干鬪醪醑飛看錦牋吟
閨桃李春花料比此芬芳俱別見和羹大用莫把翠條
謾折

傾盃樂

上元

柳耆卿

禁漏花深繡工日永蕙風布暖變韶景都門十二元宵
三五銀蟾光滿連雲複道凌飛觀聳皇居麗佳氣瑞烟
葱蒨翠華宵幸是處層城閨苑龍鳳燭交光星漢對

咫尺鰲山開雉扇會樂府兩籍神仙梨園四部絃筦向
曉色都人未散盈萬井山呼鰲忭願歲歲天仗裏常瞻
鳳輦

望湘人

春思

賀方回

厭鶯聲到枕花氣動簾醉覓愁夢相半被惜餘薰帶驚
刺眼幾許傷春春晚淚竹痕鮮佩蘭香老湘天濃暖記
小江風月佳時屢約非烟遊伴須信鸞絃易斷奈雲

和再鼓曲終人遠識羅襪無蹤舊處弄波清淺青翰棹
艤白蘋洲畔儘目臨臯飛觀不解寄一字相思幸有歸
來雙燕

望海潮

春景

秦少游

梅英疎淡冰漸溶洩東風暗換年華金谷俊游銅駝巷
陌新晴細履平沙長記誤隨車正絮飜葉舞芳思交加
柳下桃蹊亂分春色到人家西園夜飲鳴笳有華燈

礙月飛蓋妨花蘭苑未空行人漸老重來是事堪嗟烟
暝酒旗斜但倚樓極目時見棲鷗無奈歸心暗隨流水
到天涯

錢塘

柳耆卿

東南形勝三吳都會錢塘自古繁華烟柳畫橋風簾翠
幙參差十萬人家雲樹繞堤沙怒濤卷霜雪天塹無涯
市列珠璣戶盈羅綺競豪奢重湖疊巘清佳有三秋
桂子十里荷花羌笛弄晴菱歌泛夜嬉嬉釣叟蓮娃千

騎擁高牙乘時聽簫鼓吟賞烟霞異日圖將好景歸去
鳳池誇

羅鶴林云此詞流播金主亮聞歌欣然有慕於
三秋桂子十里荷花遂起投鞭渡江之志近時
謝處厚詩云誰把杭州曲子謳荷花十里桂三
秋那知卉木無情物牽動長江萬里愁余謂此
詞雖牽動長江之愁然卒為金主送死之媒未
足恨也至於荷艷桂香粧點吳山之清麗使士
大夫流連於歌舞嬉遊之樂
遂忘中原是則深可恨耳

贊賀

沈公述

山光凝翠川容如畫名都自古并州簫鼓沸天弓刀似

水連營十萬貔貅金騎走長楸少年人一一錦帶吳鉤
路入榆關鴈飛汾水正宜秋追思昔日風流有儒將
醉吟才子狂遊松偃舊亭城高故國空餘舞榭歌樓方
面倚賢侯便恐為霖雨歸去難留好向西溪恣携絃管
宴蘭舟

夜飛鵲

離別

周美成

河橋送人處良夜何其斜月遠墮餘輝銅盤燭淚已流

盡霏霏涼露霑衣相將散離會處探風前津鼓樹杪參
旗華騶會意縱揚鞭亦自行遲迢遞路回清野人語
漸無聞空帶愁歸何意重紅滿地遺鈿不見斜徑都迷
兔葵燕麥向殘陽影與人齊但徘徊班草唏噓酹酒極
望天西

薄倖

春情

賀方回

淡粧多態更的的頻回眄睐便認得琴心先許與綰合

歡雙帶記畫堂風月逢迎輕顰淺笑嬌無奈向睡鴨爐
邊翔鴛屏裡羞把香羅偷解自過了燒燈後都不見
踏青挑菜幾回憑雙燕丁寧深意往來翻恨重簾礙約
何時再正春濃酒煖人閒晝永無聊賴慙慙睡起猶有
花梢日在

大聖樂

初夏

康伯可

千朵奇峯半軒微雨曉來初過漸燕子引教雛飛菡萏

暗薰芳草池面涼多淺斟瓊卮浮綠釀展湘簾雙紋生
細波輕紈舉動團圓素月仙桂婆娑臨風對月恣樂
便好把千金邀艷娥幸太平無事擊壤鼓腹携酒高歌
富貴安居功名天賦爭奈皆由時命呵休眉鎖問朱顏
去了還更來麼

風流子

一名內
家嬌

初春

秦少游

東風吹碧草年華換行客老滄洲見梅吐舊英柳搖新

綠惱人春色還上枝頭寸心亂北隨雲黯黯東逐水悠
悠斜日半山暝烟兩岸數聲橫笛一葉扁舟 青門同
攜手前歡記渾似夢裏揚州誰念斷腸南陌回首西樓
算天長地久有時有盡奈何綿綿此恨無休擬待倩人
說與生怕伊愁

秋思

張文潜

亭臯木葉下重陽近又是搗衣秋奈愁入庾腸老侵潘
鬢謾簪黃菊花也應羞楚天晚白蘋烟盡處紅蓼水邊

頭芳草有情夕陽無語鴈橫南浦人倚西樓 玉容知
安否香箋共錦字兩處悠悠空恨碧雲離合青鳥沉浮
向風前懊惱芳心一點寸眉兩葉禁甚悶愁情到不堪
言處分付東流

秋怨

周美成

楓林凋晚葉關河迥楚客慘將歸望一川暝靄雁聲哀
怨半規涼月人影參差酒醒後淚花銷鳳蠟風幕捲金
泥砧杵韻高喚回殘夢綺羅香減牽起餘悲 亭臯分

襟地難拚處偏是掩面牽衣何況愁懷長結重見無期
想寄恨書中銀鈎空滿斷腸聲裏玉筯還垂多少暗愁
密意惟有天知

風情

周美成

新綠小池塘風簾動碎影舞斜陽美金屋去來舊時巢
燕烟花繚繞前度莓牆鳳閣繡幃深幾許聽得理絲簧
欲說又休慮乖芳信未歌先咽愁近清觴遙知新粧
了開朱戶應自待月西廂最苦夢魂今宵不到伊行問

甚時說與佳音密耗寄將秦鏡偷換韓香天便教人霎
時廝見何妨

霜葉飛

秋思

周美成

露迷衰草疎星掛涼蟾低下林表素娥青女鬪嬋娟正
倍添悽悄漸颯颯丹楓撼曉橫天雲浪魚鱗小見皓月
相看又透入清輝半餉特地留照迢遞望極關山波
穿千里度日如歲難到鳳樓今夜聽西風奈五更愁抱

想玉匣哀絃閉了無心重理相思調念故人牽離恨屏掩孤
顰淚流多少

女冠子

上元

李漢老

帝城三五燈光花市盈路天街遊處此時方信鳳闕都
民奢華豪富紗籠纔過處喝道轉身一壁小來且住見
許多才子艷質攜手並肩低語東來西往誰家女買
玉梅爭戴緩步香風度北觀南顧見畫燭影裏神仙無

數引人魂似醉不如起早步月歸去這一雙情眼怎生
禁得許多胡覷

夏景

柳耆卿

淡烟飄薄鶯花謝清和院落樹陰翠密葉成幄麥秋霽
景夏雲忽變奇峯倚寥廓波暖銀塘漲新萍綠魚躍想
端夢多暇陳王是日嫩苔生閣正鑠石天高流金晝
永楚榭光風轉蕙披襟處波翻翠幕以文會友沉李浮
瓜忍輕諾別館清閒避炎蒸豈須河朔但樽前隨分雅

歌艷舞盡成懽樂

夏景

康伯可

火雲初布遲遲永日炎暑濃陰高樹黃鸝葉底羽毛學
整方調嬌語薰風時漸動峻閣池塘芰荷爭吐畫梁紫
燕對對銜泥飛來又去想佳期容易成辜負共人人
同上畫樓斟香醕恨花無主卧象牀犀枕成何情緒有
時魂夢斷半窗殘月透簾穿戶去年今夜扇兒扇我情
人何處

雪景

周美成

同雲密布撒梨花
柳絮飛舞樓臺悄
似玉向紅爐煖閣
院宇深沉廣排筵
會聽笙歌猶未徹
漸覺輕寒透簾穿
戶亂飄僧舍密
洒歌樓酒帘如故
想樵人山徑迷蹤
路料漁人收綸罷釣
歸南浦路無伴侶
見孤村寂寞招
颭酒旗斜處
南軒孤鴈過
唳唳聲聲又無書
度見臘梅
枝上嫩蘂兩兩三三微吐

過秦樓

夏景

周美成

水浴清蟾葉喧涼吹卷陌馬聲初斷閒依露井笑撲流
螢惹破畫羅輕扇人靜夜久凭欄愁不歸眠立殘更箭
嘆年華一瞬人今千里夢沉書遠空見說鬢怯瓊梳
容銷金鏡漸懶趁時勻染梅風地溽虹雨苔滋一架舞
紅都變誰信無慘為伊才減江淹情傷荀倩但明河影
下還看稀星數點

惜餘春慢

春情

魯逸仲

弄月餘花團風輕絮露濕池塘春草鶯鶯戀友燕燕將
雛惆悵睡殘清曉還似初相見時攜手旗亭酒香梅小
向昼臨長是傷春滋味淚彈多少因甚却輕許風流
終非長久又說分飛煩惱羅衣瘦損繡被香消那更亂
紅如掃門外無窮路岐天若有情和天須老念高唐歸
夢淒涼何處水流雲遶

丹鳳吟

春恨

周美成

迤邐春光無賴翠藻翻池黃蜂遊閣朝來風暴飛絮亂
投簾幕生憎暮景倚牆臨岸杏靨天邪榆錢輕薄晝永
思惟傷枕睡起無慘殘照猶在庭角 況是別離氣味
坐來便覺心緒惡痛引澆愁酒奈愁濃如酒無計銷鑠
那堪昏暝軟軟半簷花落弄粉調朱柔素手問何時重
握此時此意長怕人道著

沁園春

退閒

辛幼安

三選初成鶴怨猿驚稼軒未來甚雲山自許平生意氣
衣冠人笑抵死塵埃意倦須還身閒要早豈為尊羹鱸
膾哉秋江上看驚弦鴈避駭浪船回東崗更葺茅齋
好都把軒窓臨水開要小舟行釣先應種柳疎籬護竹
莫礙觀梅秋菊堪飡春蘭可佩留待先生手自我沉吟
久怕君恩未許此意徘徊

摸魚兒

春晚

辛幼安

更能消幾番風雨。匆匆春又歸去。惜春長怕花開早。何況落紅無數。春且住。見說道天涯芳草迷歸路。怨春不語。算只有殷勤畫簷蛛網盡日惹飛絮。長門事。準擬佳期又誤。蛾眉曾有人妬。千金縱買相如賦。脉脉此情誰訴。君莫舞。君不見玉環飛燕皆塵土。閒愁最苦。休去倚危欄。斜陽正在烟柳斷腸處。

鶴林玉露云詞意殊怨斜陽烟柳之句其與未須愁日暮天際乍輕陰者異矣使在漢唐時寧

不賈種豆種桃之禍哉愚聞壽王見此詞頗不
悅然終不加罪可謂至德也已又題江西造口
詞懣孤臺下清江水中間多少行人淚西北是
長安可憐無數山青山遮不住畢竟東流去江
晚正愁予山深聞鷓鴣蓋南渡之初金人追隆
祐太后御舟至造口不及而還幼安因此起興
閒鷓鴣之句謂
恢復行不得也

退居

晁無咎

買陂塘旋栽楊柳依稀淮岸湘浦東臯雨過新痕漲沙
嘴鷺來鷗聚堪愛處最好是一川夜月光流注無人自
舞任翠幄張天采裊藉地酒盡未能去青綾被休憶

金閨故步儒冠曾把身誤弓刀千騎成何事荒了召平
瓜圃君試覷滿青鏡星星髻影今如許功名浪語便似
得班超封侯萬里歸計恐遲暮

花庵詞客云龍無咎摸魚兒真能道
急流勇退之意真西山極愛賞之

賀新郎

春情

李玉

篆縷銷金鼎醉沉沉庭陰轉午畫堂人靜芳草王孫知
何處惟有楊花糝徑漸玉枕騰騰春醒簾外殘紅春已

透鎮無聊殢酒厭厭病雲鬢亂未忺整 江南舊事休
重省遍天涯尋消問息斷鴻難倩月滿西樓憑欄久依
舊歸期未定又只恐併沉金井嘶騎不來銀燭暗枉教
人立盡梧桐影誰伴我對鸞鏡

玉林詞話云李君之詞雖不多見
然風流蘊藉盡于賀新郎一詞矣

初夏

葉夢得

睡起流鶯語掩蒼苔房櫳向曉亂紅無數吹盡殘花無
人問惟有垂楊自舞漸暖靄初回輕暑寶扇重尋明月

影暗塵侵尚有乘鸞女驚舊恨鎮如許江南夢斷衡

臯渚浪粘天葡萄漲綠半空烟雨無限樓前滄波意誰
採蘋花寄取但悵望蘭舟容與萬里雲帆何時到送孤
鴻目斷千山阻誰為我唱金縷

夏景

蘇東坡

乳燕飛華屋悄無人槐陰轉午晚涼新浴手弄生綃白
團扇扇手一時似玉漸困倚孤眠清熟簾外誰來推繡
戶枉教人夢斷瑤臺曲又却是風敲竹石榴半吐紅

巾感待浮花浪藥都盡伴君幽獨穠艷一枝細看取芳
意千重似束又恐被秋風驚綠若待得君來向此花前
對酒不忍觸共粉淚兩漉漉

古今詞話云蘇子瞻守錢塘有官妓秀蘭天性
黠慧善于應對湖中有宴會羣妓畢至惟秀蘭
不來遣人督之須臾方至子瞻問其故具以髮
結沐浴不覺困睡忽有人叩門聲急起而問之
乃樂營將催督也非敢怠忽謹以實告子瞻亦
恕之坐中府倅屬意於蘭見其晚來恚恨不已
責之曰必有他事以此晚至秀蘭力辨不能止
倅之怒是時榴花盛開秀蘭以一枝藉手告倅
其怒愈甚秀蘭收淚無言子瞻作賀新涼以解
之其怒始息子瞻之作皆紀目前事蓋取其沐

浴新涼曲名賀新涼也後人不知之誤為賀新
郎蓋不得子瞻之意也予瞻真所謂風流太守
也豈可與俗
吏同日語哉

苔溪漁隱云野哉楊湜之言真可入笑林東坡
此詞冠絕古今託意高遠寧為一娼而發簾外
誰來推繡戶枉教人夢斷瑤臺曲又却是風敲
竹用古詩捲簾風動竹疑是故人來之意今乃
云忽有人叩門聲急起而問之乃樂營將催督
此可笑者一也石榴半吐紅巾蹙待浮花浪藥
都盡伴君幽獨穠艷一枝細看芳意千重似束
蓋初夏之時千花事退惟榴花獨艷因以寫幽
閨之情今乃云榴花盛開秀蘭以一枝藉手告
倅此可笑者二也此詞腔調寄賀新郎乃古曲
名也今乃云取其沐浴新涼故名賀新涼後人
不知之誤為賀新郎此可笑者三也詞話中可

笑者甚衆姑舉其尤者第東坡此詞深為
不幸橫遭點污吾不可無一言以雪其恥

夏景

趙文鼎

晝永重簾捲乍池塘一番過雨
芰荷初展竹引新梢半
含粉綠陰扶疎滿院過花絮蜂稀蝶懶
窓戶沉沉人不
到伴清幽時有流鶯轉凝思久意何限
玉釵墜枕風
鬟顫湛虛堂壺冰瑩徹簾波零亂自是
仙姿清無暑月
影空垂素扇破午睡香銷餘篆一枕湖
山千里夢正白
蘋烟棹歸來晚雲弄碧楚天遠

端午

劉方叔

翠葆搖新竹正榴花枝頭葉底鬪紅爭綠誰在紗窓停
針線閒理竹西舊曲又還是蘭湯新浴手弄合歡雙綵
索笑偎人福壽低相祝金鳳彈艾花矗龍舟喚水飛
相逐記當年懷沙舊恨至今遺俗雨過平蕪浮天闊畫
鷁凌波盡簇沸十里笙歌聲續好是蟾鉤隨歸棹住歡
呼船重成顏玉猶未忍罩銀燭

端午

劉潛夫

深院榴花吐畫簾開綵衣紉扇午風清暑兒女紛紛新
結束時樣釵符艾虎早已有遊人觀渡老大逢場慵作
戲任白頭年少爭旗鼓溪雨急浪花舞靈均標致高
如許憶生平既紉蘭佩又懷椒醕誰信騷冤千載後波
底垂涎角黍又說是蛟饒龍怒把似而今醒到了料當
年醉死差無苦聊一笑弔千古

端午

劉潛夫

思遠樓前路望平堤十里湖光畫船無數綠蓋盈盈紅

粉面葉底荷花解語鬪巧結同心雙縷尚有經年離別
恨一絲絲總是相思處相見也又重午清江舊事傳
荆楚嘆人情千載如新尚沉菰黍且盡樽前今日醉誰
肯獨醒弔古泛幾盞菖蒲綠醕兩兩龍舟爭競渡奈朱
簾暮捲西山雨看未足怎歸去

七夕

宋謙父

靈鵲橋初就記迢迢重湖風浪去年時候歲月不留人
易老萬事茫茫宇宙但獨對西風搔首巧拙豈關今夕

事奈癡兒騃女流傳謬添話柄柳州柳道人識破灰
心久只好風涼月佳時踈狂如舊休笑雙星經歲別人
到中年已後雲雨夢可曾常有雪藕調冰花熏茗正梧
桐雨過新涼透且隨分一盃酒

櫟括東坡後赤壁

宋謙甫

步自雪堂去望臨皋將歸二客從予遵路木葉蕭蕭霜
露降仰見天高月吐共對影行歌頻顧月白風清如此
夜嘆無肴有酒成虛度聞薄暮網罟舉歸而斗酒謀

諸婦便携鱗載酒相從舊追遊處斷岸橫江尋赤壁不
復江山如故但放舟中流容與客去冥然方就睡夢踰
躑羽衣揖余語相顧笑遂驚悟

遊湖

劉改之

睡覺啼鶯曉醉西湖兩峰日日買花簪帽去盡酒徒無
人問惟有玉山自倒任拍手兒童爭笑一騎乘風翻然
去避魚龍不見波聲悄歌韻遠喚蘇小神仙路近蓬
萊島紫雲深參差禁樹有烟花遶人世紅塵西障日百

計不如歸好付樂事與他年少費盡柳金梨雪句問沉香亭北何時召心未愜鬢先老

吉席

辛幼安

瑞氣籠清曉捲珠簾次第笙歌一時齊奏無限神仙離蓬島鳳駕鸞車初到見擁箇仙娥窈窕玉珮玎璫風縹緲望嬌姿一似垂楊裊天上有世間少劉郎正是當年少更那堪天教付與最多才貌玉樹瓊枝相映耀誰與安排忒好有多少風流歡笑直待來春成名了馬如

龍綠綬欺芳草同富貴又偕老

金明池

春遊

秦少游

瓊苑金池青門紫陌似雪楊花滿路雲日淡天低晝永
過三點兩點細雨好花枝半出牆頭似悵望芳草王孫
何處更水遶人家橋當門巷燕燕鶯鶯飛舞怎得東
君長為主把綠鬢朱顏一時留住佳人唱金衣莫惜才
子倒玉山休訴況春來倍覺傷心念故國情多新年愁

苦縱寶馬嘶風紅塵拂面也則尋芳歸去

白苧

冬景

柳耆卿

繡簾垂畫堂悄寒風浙瀝遙天萬里黯淡同雲暮暮漸
紛紛六花零亂散空碧姑射宴瑤池把碎玉零珠拋擲
林巒望中高下瓊瑤一色嚴子陵釣臺歸路迷蹤跡

追惜燕然畫角寶玦珊瑚是時丞相虛作銀城換得當
此際偏宜訪袁安宅醺醺醉了任他金釵舞困玉壺傾側

又是東君暗遣花神先報南國昨夜江梅漏泄春消息
十二時

秋夜

柳耆卿

晚晴初淡烟籠月風透蟾光如洗覺翠帳涼生秋思漸
入微寒天氣敗葉敲窓西風滿院睡不成還起更漏咽
滴破憂心萬感並生都在離人愁耳天怎知當時一
句做得十分縈繫夜永有時分明枕上覷著孜孜地燭
暗時酒醒元來又是夢裡睡覺來披衣獨坐萬種無

慘情意怎得伊來重諧雲雨再整餘香被祝告天發願
從今永無拋棄

蘭陵王

春恨

張仲宗

捲珠箔朝雨輕陰乍閣欄干外烟柳弄晴芳草侵階映
紅藥東風如許惡吹落梢頭嫩萼屏山掩沉水倦薰中
酒心情怕盃勺 尋思舊京洛正年少踈狂歌笑迷著
障泥油壁催梳掠曾馳道同載上林攜手燈夜初過早

共約又爭信飄泊 寂寞念行樂任粉淡衣襟音斷絃
索瓊枝壁月春如昨悵別後華表那回雙鶴相思前事
除夢覓裏暫忘却

詠柳

周美成

柳陰直烟裏絲絲弄碧隋堤上曾見幾番拂水飄綿送
行色登臨望故國誰惜京華倦客長亭路年去歲來應
折柔條過千尺 閒尋舊蹤跡又酒趁哀絃燈照離席
梨花榆火催寒食愁一箭風快半篙波暖回頭迢遞便

數驛望人在天北
悽惻恨堆積
漸別浦縈回津堠岑
寂斜陽冉冉春無極
念月榭攜手露橋吹笛
沉思前事似夢裡淚暗滴

瑞龍吟

春景

周美成

章臺路還見褪粉梅梢試花桃樹惜惜坊陌人家定巢
燕子歸來舊處黯凝竚因念箇人癡小乍窺門戶侵
晨淺約宮黃障風映袖盈盈笑語前度劉郎重到訪

鄰尋里同時歌舞惟有舊家秋娘聲價如故吟牋賦筆
猶記燕臺句知誰伴名園露飲東城閒步事與孤鴻去
探春盡是傷離緒官柳低金縷歸騎晚纖纖池塘飛雨
斷腸院落一簾風絮

花庵詞客云按美成此詞自章臺路至歸來舊處是第一段自點凝竚至盈盈笑語是第二段此謂之雙拽頭屬正平調自前度劉郎以下即犯大石係第三段至歸騎晚以下四句再歸正平今諸本皆於吟牋賦筆處分段者非也

大酺

春雨

周美成

對宿煙收春禽靜飛雨時鳴高屋牆頭青玉旆洗鉛霜
都盡嫩梢相觸潤逼琴絲寒侵枕障蟲網吹粘簾竹邨
亭無人處聽簷聲不斷困眠初熟奈愁極頓驚夢輕難
記自憐幽獨行人歸意速最先念流潦妨車轂怎奈
向蘭成憔悴衛玠清羸等閒時易傷心目未怪平陽客
雙淚落笛中哀曲況蕭索青蕪國紅糝鋪地門外荊桃
如菽夜遊共誰秉燭

浪淘沙慢

春別

周美成

晝陰重。霜凋岸草，霧隱城堞。南陌脂車待發，東門帳飲。
乍闕正拂面，垂楊堪攬結。掩紅淚、玉手親折。念漢浦離鴻去，何許經時信音絕。
情切望中地遠，天闊向露冷。風清無人處，耿耿寒漏咽。嗟萬事難忘，惟是輕別翠樽。
未竭憑斷雲，留取西樓殘月。羅帶光銷紋衾疊，連環解。舊香頓歇，怨歌永瓊壺敲盡，缺恨春去不與人期。弄夜

色空餘滿地梨花雪

玉女搖仙佩

佳人

柳耆卿

飛瓊伴侶偶別珠宮未返神仙行綴取次梳粧尋常言語有得幾多姝麗擬把名花比恐傍人笑我談何容易細思算奇葩艷卉惟是深紅淺白而已爭如這多情占得人間千嬌百媚須信畫堂綉閣皓月清風忍把光陰輕棄自古及今佳人才子少得當年雙美且恁相偎

倚未消得憐我多才多藝願嫋嫋蘭心蕙性枕前言下
表余深意為盟誓今生斷不辜鴛被

多麗

春情

聶冠卿

想人生美景良辰堪惜向其間賞心樂事古來難是并
得況東城鳳臺沁苑泛晴波淺照金碧露洗華桐烟霏
絲柳綠陰搖曳蕩春一色畫堂迥玉簪瓊佩高會盡詞
客清歡久重燃絳蠟別就瑤席有翩若驚鴻體態暮

為行雨標格逞朱唇緩歌妖麗似聽流鶯亂花隔慢舞
縈回嬌鬟低顰腰肢纖細困無力忍分散彩雲歸後何
處更尋覓休辭醉明月好花莫謾輕擲

花庵詞客云冠卿之詞不多見如此篇亦可謂
才情富艷矣其露洗華桐四句又所謂玉中之
拱壁珠中之夜光每
一觀之撫玩無數

六醜

落花

周美成

正單衣試酒悵客裏光陰虛擲願春暫留春歸如過翼

一去無跡為問家何在夜來風雨送楚宮傾國釵鈿墮
處遺香澤亂點桃蹊輕翻柳陌多情更誰追惜但蜂媒
蝶使時叩窗牖東園岑寂漸蒙籠暗碧靜遠珍叢底
成歎息長條故惹行客似牽衣待話別情無極殘英小
強簪巾幘終不似一朶釵頭顫裊向人欹側漂流處莫
趁潮汐恐斷鴻尚有相思字何由見得

寶鼎現

上元

康伯可

夕陽西下暮靄紅
隘香風羅綺乘麗景
華燈爭放濃焰
燒空連錦砌
觀皓月浸嚴城
如畫花影寒籠絳
藥漸掩
映芙蓉萬頃迤邐齊開秋水
太守無限行歌意擁麾
幢光動朱翠傾萬井歌臺舞榭
瞻望朱輪駢鼓吹控寶
馬耀貔貅千騎銀燭交光數里
似亂簇寒星萬點擁入
蓬壺影裏
宴閣多才環艷粉
瑤簪珠履恐看看丹詔
催奉宸遊燕侍便趁早占通宵
醉緩引笙歌妓任畫角
吹老梅花月滿西樓十二

三臺

清明

万俟雅言

見梨花初帶夜月海棠半含朝雨內苑春不禁過青門
御溝漲潛通南浦東風靜細柳垂金縷望鳳闕非烟非
霧好時代朝野多懼徧九陌太平簫鼓乍鶯兒百轉斷
續燕子飛來飛去近綠水臺榭映鞦韆鬪草聚雙雙遊
女飭香更酒冷踏青路會暗識天桃朱戶向晚驟寶
馬雕鞍醉襟惹亂花飛絮正輕寒輕暖漏永半陰半晴

雲暮禁火天已是試新粧歲華到三分佳處清明看漢
宮傳蠟炬散翠煙飛入槐府斂兵衛閭闔門開住傳宣
又還休務

哨遍

歸去來辭

蘇東坡

為米折腰因酒棄家口體交相累歸去來誰不遣君歸
覺從前皆非今是露未晞征夫指予歸路門前笑語喧
童稚嗟舊菊都荒新松暗老吾年今已如此但小牕容

膝閉柴扉策杖看孤雲暮鴻飛雲出無心鳥倦知還本
非有意噫歸去來兮我今忘我兼忘世親戚無浪語
琴書中有真味步翠麓崎嶇泛溪窈窕涓涓暗谷流春
水觀草木欣榮幽人自感吾生行且休矣念寓形宇內
復幾時不自覺皇皇欲何之委吾心去留誰計神仙知
在何處富貴非吾願但知臨水登山嘯詠自引壺觴自
醉此生天命更何疑且乘流遇坎還止


戚氏

秋夜

柳耆卿

晚秋天一霎微雨灑庭軒
檻菊蕭疎井桐零亂惹殘烟
淒然望江關飛雲黯淡夕陽間
當時宋玉悲感向此臨
水與登山遠道迢遞行人淒楚
倦聽隴水潺湲正蟬鳴
敗葉蛩響衰草相應聲喧
孤館度日如年風露漸變
悄悄至更闌長天靜絳河清淺
皓月嬋娟思綿綿夜永
對景那堪屈指暗想從前
未名未祿綺陌紅樓往往經
歲遷延
帝里風光好當年少日暮宴朝歡
况有狂朋

怪侶遇當歌對酒競留連別來迅景如梭舊遊似夢烟
水程何限念利名憔悴長縈絆追往事空慘愁顏漏箭
移稍覺輕寒聽鳴咽畫角數聲殘對閒牕畔停燈向曉
抱影無眠



草堂詩餘卷四